



# STINAPA TA INFORMA

## REGULASHON DI AWA

Tur hende riba Boneiru por mira ku dia pa dia nos isla ta bira mas drùk. Tin hopi konstrukshon i e kantidat di outo ta krese dia pa dia tambe. Meskos ku na Aruba, Kòrsou i Sint Maarten ta kuminsá sinti e nesensidat di imigrantenan di e region Karibense i Latinoamérikanu pa traha den konstrukshon i despues komo sirbiente den hotèl i restaurant. Lo bin mas turista i habitante, pues lo bai bira hopi mas drùk ainda. Pero no riba suela so tin kambio ta tumando lugá. Tambe bou di suela. Pasobra konstrukshonnan i kamindanan nobo tambe tin nan efekto riba e “regulashon di awa”. Unda i kon hundu e awa di den suela ta i unda e áwaseru ta kore? Unda e awa sushi ta bai? Pa mantenshon di e refnan di koral úniko rondó di Boneiru ta di sumo importansha ku áwaseru i awa sushi no por yega laman sin ku e ta filtrá. Tera i alimentashon por tapa e koral fásilmente i stroba e eko-sistema frágil. Pa e awa sushi ku ta ser produsí te un distansha di 200 meter for di kosta lo bin solushon den forma di un sistema di kloaka ku un sistema di filtrashon, pero kiko ta bai pasa ku e áwaseru? Pa kolektá áwaseru riba nos isla nos tin entre otro e saliñanan i e áreanan di kolektá awa manera kantu di kaminda pa bai airo-puerto. Gotomeer ta un bon ehèmpel di un renbak natural. Ora ku tin áwaseru pisá e awa di hinter e área ta kore bai den dje. Eina e ta evaporá òf e ta lèk pokopoko dor di kleps bai laman. I e kleps ta fungi komo un filter. E awa den e saliñanan ta hopi salu. Esei ta perfekto pa e flamingonan ku ta bin buska kuminda eiden. Pa motibu di e konsentrashon di salu, muskita no por brui eiden tampoko. Pa un bon regulashon di awa den e área di Goto ta importante pa e awa por kore bai den Gotomeer sin estorbo. Si e awa dushi keda para un kaminda e por bira un lugá di brui pa muskita. For di punto di bista di salubridat públiko ta importante pa tin mas poko lugá kaminda awa dushi por keda stanká. E ruta ku e áwaseru ta sigui riba kaminda pa bai un saliña por keda strobá fásil. Por ehèmpel dor di traha un kaminda nobo òf ora ku ta yena un tereno kaminda lo bai tin konstrukshon. Si no tene sufisiente kuenta ku e efektonan riba regulashon di awa, un akumulashon di tera asina por aktua komo un dam. “Duikers” (tubu bou di kaminda) i roi mester perkurá ku e awa por bai fásil. Ora eseiinan no ta funshoná bon mas òf nan keda tapá ku sushi di konstrukshon, e awa no por bai e saliña mas. Asina por krea na lugánan inesperá, plas di awa dushi kaminda muskita ta brui ku smak. *Skirbí pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURESA



**Traha hunturu na un desaroyo duradero pa Boneiru**